

KALA NESHIIVO LAKALUNGA



Nota Di leshwa ngaha.

Ndele Elia Omutisbi, oo a li . . . omukalimo waGilead, ta ti kuAhab, Ngaashi OMWENE Kalunga kaIsrael e nomwenyo, ou ame handi kala ofika koshipala shaye, itaku ka kala nande omume ile odula omido edi nhatu, ashike shelikolelela kondjovo yange.

Ndele ondjovo yOMWENE ye uya kuye, tai ti,

Inda ko, ndele pungulukila koushilo, ndele u hondame pokamulonga Kerit—Kerit, (Nda hala okutya) keli komesho yaJordan.

Ndele tashi kala, kutya u na okunwa mokamulonga; ndele Ame nda lombwela omakola e ku palule . . .

Onghee okwa ya ndele ta ningi shelikolelela pandjovo yOMWENE: okwa ya ndele ta kala pokamulonga Kerit, oko ke li komesho yaJordan.

Nomakola e mu etela omungome nombelela ongula, nomungome nombelela konguloshi; nokwa nwa mokamulonga.

Ndele eshi pa pita efimbo, okamulonga ka pwinina, molwaashi ina pa kala odula moshilongo.

Ndele ondjovo yOMWENE ye uya kuye, tai ti,

Fikama, ndele inda kuSarfat, shaSidon, ndele kala ko: tala, Ame nda lombwela omufiekadi e ku palule.

Onghee okwa fikama ndele ta i kuSarfat. Ndele eshi e uya poshivelo shoshilando, tala, omufiyekadi a li ko ta tyava oikuni: nokwe mu ifana, ndele ta ti, Etele nge, handi ku ilikana, omeva manini meholo, opo ndi nwe.

Ndele fimbo ta i eke a tale ko, ye okwe mu ifana, ndele ta ti, Etele nge, handi ku ilikana, okapambu komungome meke loye.

Ndele ta ti, Ngaashi OMWENE Kalunga koye e nomwenyo, ame kandi na omungome, ashike oufila eshambekela moshuyuma, nomaadi manini moshanga: ndele, tala, ohandi tyava ikuni ivali, opo ndi ye ndele ndi li pakele po nosho mumwangemati, opo tu lye, nokufya.

Ndele Elia ta ti kuye, Ino tila; inda u ninge ngaashi wa ti: ashike ningile nge po okamungome kanini tete, ndele ka eta kuame, nokonima li pakela po no . . . monamati woye.

Osheshi OMWENE Kalunga kaIsrael ta ti, Oshiyuma shoufila itashi ka pwa, noshanga shomaadi itashi ka pwa, fiyo efiku olo OMWENE ta lokifile edu odula.

Nokwa ya mo nokuningi shelikolelela kelombwelo laElisha: nokwa lya, naye, neumbo laye, omafiku mahapu.

Ndele oshiyuma shoufila inashi pwa, noshanga shomaadi inashi pwa, shelikolelela kondjovo yOMWENE, oyo ya popiwa kuElia.

Epopyo longula ei, manga inandi ya kondje yomafuta, onda hoolola eleshelo, laashi: *Kala Neshiivo LaKalunga.*

² Ndele paife, Omwene, yambeka Ondjovo Yoye ngaashi Ya uka komesho, nOmhepo Iyapuki nai kwate omadilaadilo etu nomalipulo etu, noi tu longekidile etalelepo Laye, ngaashi twe Mu pula e uye. Osheshi inatu uya keumbo lOmwene tu monike, ile tu tale, ashike otu Ku lihonge, nokushiiva oushitwe Woye, nondjila Yoye, noilonga Yoye, opo tu dule okutaalela omaupyakadi onghalamwenyo, neshilipaleko lashili, neshiivo laKalunga. Shi ninga, Omwene. Medina laJesus twe shi pula. Amen.

³ Ongula oya kala ii. Okwa li kwa pupyala unene nodwi, novanhu ova li mepandavanda, vafyodjala, nedu ola li la pupyala unene lelilongikida okuxwika. Ashishe eshi osha li euliko lomatimba avo nomikalo davo da shinduka.

⁴ Ou wete, Ahab okwa li ta pangele mu—muIsrael, pefimbo olo, ile kuIsrael, nokwa li mwii unene e dule eehamba adishe daIsrael. Ina pa kala nale nande ohamba ii ngaashi Ahab, osheshi ye, a kala a longwa noku shi shii nawa, ina efa po okutwikila oku udifa nai Kalunga mukesheshimwe osho a ninga. Nonande a li e na etanga linene lovakwaita launganekwa, novanhu va punapala unene koshi yepangelo laye, ashike, tuu, ito udifa nai Kalunga ndele to kala wa teelega u ye kokule.

⁵ Ndele hano, mohango yaye, ponhele a hombole movanhu vaye, okwa ya nokuhombola omulunde, woikalunga, omulinyongameni woikalunga. Okwa hambola Isabela. Ndele ka li omwiitaveli.

⁶ Ndele haomwiitaveli ta hambola nande omuheneitavelo, kutya omonghalo ilipi. Napa hambolwe alushe ovaitaveli.

⁷ Ashike Ahab a ninga oshinima eshi shii. Ndele kape na elimbililo ashike Isabela okwa li omukainhu muwa. Ndele a wila kwaasho afa e wetike, ponhele yaasho a li. Osho ovanhu vahapu, va ninga epuko, lelifa fiyo efiku eli.

⁸ Ndele okwa eta oikalunga moshiwana, mokati kovanhu. Ndele ovanhu, ovapisteli, ovaudifi vavo, va ninga oshihakanwa kounhwa ou munene.

9 Ndele oshi li efano loshilongo shetu nena. Otwa wila koshi younhwa. Kape na elimbililo ovapristeli ve lipula kutya otashi kala nawa, shama ashike epangelo lavo leshi kufa ko. Ashike nghina konasha kwaasho epangelo la kufa ko, oshi na ku kala eshi Kalunga a kufa ko. Ndele ovanhu ve lipula kutya otashi kala ashike nawa nge tava kufa ombinga moinima yavo yopaunyuni.

10 Ndele umwe ta dulu okupula nge ndi li shune mwaashi nda ti, kutya osha li sha fa lela efano lonena. Inatu lipuleni kutya katu fi ovalinyongameni voikalunga, ashike otuli. Nepangelo ole shi yambidida. Ovanhu nena ovalinyongameni voikalunga, molwaashi vo—vo velinyongamena oikalunga. Vamwe vomuvo otave linyongamene ovanyandi voinyandwa, onga oikalunga. Vamwe otave linyongamene oimaliwa, onga oikalunga. Ndele vamwe tave li nyongamene ovanyandi veekino, ngaashi oikalunga. Ashike ashishe osho wa tula komesho yaKalunga osho oshikalunga, nashi kale nee oshike.

11 Nonande okuSatana, omutondi wetu munene, ou umwe a lungama, fiyo a tula nokuli, omafimbo amwe, ongeleka koshipala shaKalunga. Oto dulu u kale nongeleka inene. Otashi dulika etungo linene, ile oukwaongalo munene. Ndele, vali, otashi dulika eongalo linene, ashike ino pitikila sha komesho yaKalunga, momutima woye. Kesheshimwe, komesho yaKalunga, osho oshikalunga.

12 Ndele ovanhu ovo ova li ve shi shii kutya kave li pamhepo shafa eshi va kala, koshi yepangelo leehamba dikwao. Ndele ve lipula, molwaashi ashike va li oshiwana oshikwamhepo, kutya ashishe otashi kala nawa. Ndele oyo ondjila nafye twe uya yoo panghatu oyo.

13 Eemwedi dimwe da pita onda li handi popi kukaume kange muwa. Ndele ta ti, “Mumwatate Branham, onda itavela kutya Omapangelo Ahangana aa owaa findila hanga pedu.” Okwa ti, “Ove alushe oto kuu mo oulunde nonghee Kalunga taka handukila oshiwana eshi.”

14 Onda ti, “Oku na oku shi ninga, opo a kale omuyuuki.”

Okwa ti, “Ashike, Mumwatate Branham, owa dimbwa kutya oshiwana eshi osha tungilwa kOmishangwa. Ndele ootatekulu ve uya oku, naKalunga e tu pa efyuululo eli. Ndele fye oshiwana oshikwamhepo.”

15 Onda ti, “Osho oshili, ashishe. Ndele kape na nande umwe a shiiva nghee nda pandula oshiwana eshi! Ashike, tala, mumwatate, Israel yoo okwa li omuhoololwa waKalunga, ndele Okwe mu tumina ovaxunganeki novalumenhu vanene. Ashike Kalunga iha fikamene po oulunde. Okwa ninga Israel a teye ombuto keshe va kuna. Ndele nge Okwa ninga Israel a teye osho a kunine, Ote tu ningi tu teye osho twa kuna. Kena efimaneko lomunhu.”

¹⁶ Ndele twe uya ponghatu tu lipule kutya molwaashi tuli twa fuwila kwaasho ootatekulu va ninga, ile kwaasho ovatoti po vetu vakula veengeleka detu, kwaasho omaliyambo avo ali manene kuKalunga, osho shi li nawa noshipandulifa unene, ashike ita tu dulu oku kufa exupifo kwaasho va ninga! Exupifo oshinima shopaumwene pokati komunhu keshe naKalunga. Kashi fi pashiwana, nongelegeka yetu, ashike onafye vene komesho yaKalunga, hatu nyamukula.

¹⁷ Oshe uya ponghatu moshilongo shetu, fiyo omokati kovanhu ovakwamhepo lela ava tuna, oto i kovalumenhu ovakwamhepo nokovakainhu, ndele to hange momitima davo kutya omwa kambela sha.

¹⁸ Otwa kala, moivike ihupi ya ka pita, onda kala nokuya moinima imwe, nokumona mo kutya movalumenhu ava nde lipula kutya ova li exuku, nande ngaho onda mona kutya ova tula elineekelo moinima yopokafimbo, tava i nokupopya kutya, “Kalunga okwa pa nge sha kula unene *osho-naa-sho*. Kalunga a yandja. . .” Oto litade.

¹⁹ Oinima inene haalushe ili mehalo laKalunga. Kalunga oha lokifile odula kovayuki nokovahenouyuki. Ashike ounyuni eshi wa pumbwa nena kashi fi eitavelo lelitado, okukendabala okulitadela musha nokushi ifana shopamhepo.

²⁰ Omafimbo amwe eitavelo ota li longo oikumifilonga inene, ndele natango inashi dja momutima wopamhepo. Omwene wetu ina tya? “Vahapu tave uya kuAme, efiku olo, nokutya, ‘Ina ndi ninga *eshi naashinya*, mEdina Loye?’ Ndele Ohandi va hepaululile, ‘Djeni po puAme, onye ovalongi vowii,’” Owii oshike? Oo oshinima osho u shii okuninga sha yuka ndele iho shi ningi. “Kandi mu shi nonale,” Ta ka tya. Ndele otu li mefiku olo.

²¹ Eshi twa pumbwa nena kashi fi oinima ihapu. Otu shi na. Inatu pumbwa eengeleka dinene. Inatu pumbwa omaongalo manene. Inatu pumbwa shihapu koladio nokokino. Inatu pumbwa ihapu yomwaayo. Ashike eshi twa pumbwa nena, oku kala pamhepo, ovanhu ovo tave li ninipike vovene koshipala shaKalunga, ngeenge kave na epeni, ndele tava ilikana fiyo omhepo muvo ya wanenwa kouwa waKalunga, nepapuduko la kufa ombinga meni momitima davo, okulundulula omikalo davo nonghalo omo ve li.

²² Oto dulu oku kala uhe na eenghaku keemhadi doye, oto dulu oku kala wa djala moinyakwi, ashike shimwe momutima woye olwiimbo lekwelengedjo laKalunga. Shixwepo ndi kale osho ndi na ponhele yoimaliwa aishe ili mounyuni.

²³ Onghee ito dulu okutya oinima yopaushitwe oyo alushe edidiliko leyambeko laKalunga. David okwe shi popya kOmwene, kutya okwa mona owii wa indjipala komesho yaye. . .wafa omuti woshimhana munene. Ashike Kalunga

okwe mu pula, “Ove we mu konenena nale kexulilo?” Kashi na nouwa ulipi woikutu hatu djala, oshifike peni tu na okulya, osho hasho hashi i mOukalipo waKalunga. Olutu omu tu li, ota li xulu po, kashi na la takamifwa ngahelipi. Ashike omwenyo ou uli momunhu; onghalo yomhepo oyo ta i linyengele mOukalipo waKalunga omunamwenyo.

²⁴ Ashike ohatu kufa ko oinima onga yanafangwa. Ohatu diladila ashike kutya molwaashi fye oshiwa... Onghee Ahab naIsrael ashishe, mefiku olo, ova kufile ko oinima onga yanafangwa, kutya kesheshimwe oshi li nawa. Ovapristeli novaudifi vavo ova kendabala oku va lombwela, “Aishe oi li nawa. Kesheshimwe oshi li ashike nawa.” Ashike ova li ve na umwe, okwa lila e li omhinge naasho sha puka, molwaashi ou oku shi shii kutya omuyapuki Kalunga ka li a wanenwa kelunduluko lexumo loukwamhepo uheneliyapulo.

²⁵ Onghee osho Kalunga kEulu ta kala elifa nena. Mwaaishie yeenghendabala detu nomoinima inene oyo hatu kendabala okuninga, Kalunga ita hafifwa nande kwaaishe ili kondje yonghalamwenyo aishe inai yapulwa koshipala Shaye.

²⁶ Ohatu dulu okutungana eefikola, omalukalwa, nomatwaliongalo. Ohatu dulu oku kala tu na omahangano. Ohatu dulu okuninga oinima inene, ashike tuu Kalunga ita wanenwa fiyo omwenyo womunhu wa yapulwa koaltari yaKalunga, keliyandjo loilonga yaKalunga. Ndele ito shi mono vali.

²⁷ Oto hange oyoongalele yomailikano etu yanghundipala unene, konima ashike yeilikano lomunute, okunukila mombete. Ohatu hange tashi ningwana lumwe ile luvali mefiku. Omangha, atushe tu na ondjo. Oshiwana shetu, pamikalo, otashi shinduka. Otuna ooBilly Graham nooOral Roberts keshepamwe. Ashike fiyo pe uya enotelo momutima waAmerica, oku shi alulila kuKalunga omunamwenyo vali, keshiivo lomwenyo, keitavelo iha li fi muKalunga omunamwenyo. Ohatu denge ashike omauluvi etu, onga ta eshi popi, mo.

²⁸ Ohatu dulu okweenda neenhulo detu da umhuka mo, nomakutwi etu atonyenwa kombuda, nokweenda mepandavanda, nokuhala okwiifanwa “Ndokotola” ile “Omupristelikulunhu.” Ohatu dulu okuwilika eengeleka dinenenene dafa adike dili moshilongo, nohatu dulu ku kala ngaashi neliningifo ngaashi hatu kala, kutya kape na omunhu ta tula omunwe konghalamwenyo yetu. Ashike fiyo omwenyo oo uli meni letu we uya momundilo molwa Kalunga, fiyo shimwe mwinya, she Mu djuulukwa! “Ngaashi oholongo tai kwene komatondokelo omeva, omwenyo wange tau Ku djuulukwa, O Kalunga.” Fiyo twa fika koludi olo lokushiiva!

²⁹ Onghenee, oukomunisi, naikwao, otai kufa ko omadu ngaashi tava ningi, nokudjolina akushe oko hatu ningi itaku shi xulifa po nande. Osha tengenekwa tashi ya. Ashike Kalunga ota ifana kOngeleka Yaye.

³⁰ Ongahelipi omukainhu ou munini a kala nale wondodo yaElia! Molwaashi, alushe onghatu yoye ohai ulike eshi uli. Ndele, vali, okwa kala a hoololwa a hafife omuxunganeki waKalunga. Dimbuluka, okwa li Omupaani, haOmujuda.

³¹ Ndele oshilongo osha pile po. Ndele kape na elimbililo kutya omukainhu ou munini, a kala wondodo oyo, oku kala omwiitaveli woludi... Osheshi otu wetu kutya Kalunga ngeno ine mu ifana, ngeno nge ka li umwe a wana okuhafifa omuxunganeki waKalunga. Shaashi Ita tumu nande omuxunganeki Waye keumbo olo la li inaa li wana.

³² Ka sha li ehoololo laye. Osha li ehoololo laKalunga. Ka sha li oye e mu kaleka po. Osha li oKalunga e mu kaleka po. Okwa kala a tulwa pokamulonga. Omakola a li hae mu palula. Ashike osha li elombwelo laKalunga opo shimwe shikufe ombinga. Ndele Kalunga oha i lela komwiitaveli woushitwe wafa waElia.

³³ Okwa li omufiyekadi. Ndele atushe otu shi shii osho ye, omufiyekadi, a pitila musho, nomusamane waye a fya nokamatyona okutekula.

³⁴ Ndele moilongo omo, ohava xupile moikunomwa yavo. Ka va li neepoloyeka ngaashi tu di na nena, ndele—ndele ouxupilo moimeno. Ohava xupile moikunomwa yavo. Nomolwaashi owii wovanhu, neenghedi davo da shinduka, oda eta oshikukuta moshilongo, apa aveshe ova li vafyondjala nokufya.

³⁵ Ndele hano twa mono kutya kape na omalimbililo okwa ilikana oufiku noufiku, oufiku aushe, ngaashi a tameka okumona kutya oshiyuma shoufila otashi ende tashi kuluka, kuluka, kuluka. Ndele osha ya ponghatu fiyo ka mwali vali nande ekopiliyadi likwao loufila moshiyuma. Ashishe e na osha li ashike okashambekela kanini. Efyo ola li leuya moshivelo, pomuvelo waye. Osheshi kapa li omhito yokumona vali. Oshiwana ashishe osha li shafyondjala.

³⁶ Ndele, omaadi, okwa li ashike olungutoliyadi lafyaala moshikwatelwa shinini. Shi li kutya ouwaadi nokaufila pokati kaye nefyo. Oku na oku ya melitulemo lela kombinga yomailikano aye. Oto pitike shi denge eumbo loye, otashi kala elitulemo li dule eshi tu li mongula ei, ngeenge tu shi shii kutya efyo ola nangala poshivelo.

³⁷ Ndele onda itavela, pamwe, ohatu li pula, kashiimba, eshi, kutya okwa ilikana oufiku aushe, nomefiku limwe osha pwa. Ota dulu okutala komilungu danganya dokamati kaye kanini komido dopu nhatu ile nhee. Ndele ota dulu okutala

komakipa aye mwene taa nangatele po, ngaashi eenhumba ta di diko. Ndele osha li oshinima shinyanyalifi, ngaashi yina ou, mokumona oinima ei tai i. Ndele, tuu, nomaoko aye koshipala shaKalunga, ta ilikana omutenya noufiku, “Paife otwa uka pedu keke limwe loufila nonguto iyadi yomaadi.”

³⁸ Ou shi shii, oshinima shilimbilika. Kalunga pitika eshi shi ningine mukeshu umwe womunye, nge ino ka uda nge handi udifa vali. Pitika eli li kale etumwalaka. Oshilimbilika, shilimbilika unene, kutya omafimbo amwe Kalunga oha ningi oinima ngaho.

³⁹ Ou shi shii, ngeenge otwa hepaulula omatimba etu nokuwanifa po oshipumbiwa keshe osho Kalunga a pumbwa... Otwa itavela muKalunga. Ope na eenghalo dina okuwanifwa po, ndele oshelikolelela pahalo Laye. Ndele otwa hepaulula omatimba etu, naaishe twa ninga yapuka, yayuka, twa mana kesheshimwe osho tu shi okuninga. Keshe oshipumbiwa osho Kalunga a ninga, ile a pula, otwa wanifa oshipumbiwa osho, ndele tuu Oku li a mwena. Ite tu nyamukula.

⁴⁰ Onda shiiva kutya ohandi popi kovanhu, ongula ei, ovo ve uya konhele oko. Nda li ko, omafimbo mahapu, ame mwene. Eshi nda shuna nonda mona mo onghalamwenyo yange nokuangula emanya keshe, ndele nda mona kutya onda ninga shimwe shapuka, ohandi shi hepaulula mo nokutya, “Omwene Kalunga, ohandi shi yukifa,” noku ya okuninga ngaho. Hano okualuka vali nokutya, “Paife, Omwene, Oove Kalunga; Oto nyamukula nge. Paushili onda wanifa keshe omhumbwe oyo Wa pumbwa ndi ninge. Ndele keshe oshipumbiwa, onde shi wanifa po.” Ndele natango Ite linyenge, oku li a mwena, opo nee to kala wa shiiva kutya Ye oKalunga. Ino teka omukumo. Oshinima shimwe osheshi, kutya, momutima woye, oku kala neshiivo laKalunga.

⁴¹ Eleshelo lange. Kala neshiivo, tete, fimbo ino ninga sha. Kala neshiivo, momutima woye, kutya oKalunga. Ndele ngeenge ove wa wanifa kesheshimwe osho Ye ta ti, hano to shiiva kutya Ye oKalunga, opo nee eitavelo tali i moilonga, ngaho. Eitavelo lafikama lakanghama, molwaashi li shi shii kutya oYe.

⁴² Ndele wa wanifa po oshipumbiwa keshe. Owa itavela kutya oYe, neitavelo ladama lakanghama. Akutu, layambekwa Edina Laye! Eitavelo itali linyenge, osheshi la shiiva kutya Kalunga oye, nomufuti waavo have Mu kongu noudinini.

⁴³ Eshi nashi kulukile moule ndele inashi dja mo mwoove, Etwaliongalo Branham. Nge owa wanifa po oipumbiwa yaKalunga, nomomutima woye owa itavela kutya oYe, Kalunga ota yeke ashike eitavelo loye, osheshi Oku hole oku shi ninga. Owa hepaulula mo omatimba oye nowa wanifa po

oshipumbiwa keshe osho Kalunga a pumbwa, ndele natango Ye oku li a mwena, dimbuluka, eitavelo ola ti oYe. Hano eitavelo ladama musho, lihe shi shii kutya okombinga ya shike, ashike oli shi shii kutya oYe, nola shiiva kutya oYe.

⁴⁴ Hano, dimbuluka, nge oYe, Eendjovo Daye odi na okukala doshili. Ndele nge Okwa pula ushakeneke eenghalo odo, nowa ninga, Oku na okupashukila Ondjovo Yaye. Ino pilamena ko, nokutya, “Iya, inandi veluka nande. Ame...” Akutu, hepele ove, eitavelo linghundi. Ino shi itavela. Nge kesheshimwe osha hepaululwa, nakesheshimwe sha dja mo, nowa wanifa po oshipumbiwa shaKalunga, eitavelo ladama lela opo. Kape na sha tashi li linyengifa. Oye, nowa shiiva. “Ava hava teeleele kOmwene otava pewa eenghono dipe; otava tuka nomavava onhwa. Otava lotoka ndele itava loloka; nge tava ende, itava wile po.”

⁴⁵ Teelela, ngeenge wa wanifa po oipumbiwa Yaye. Osho tashi eta eitavelo loye poluhaela. Nge owa wanifa po... oipumbiwa yaKalunga oyo ya ningwa, ile wanifa po, nowe shi kufa ko pauyadi, nowa mana kesheshimwe osho Kalunga a pumbwa u ninge, hano eitavelo loye latulumukwa lela opo, kutya oYe. Kala neshiivo laKalunga.

⁴⁶ Ou shi shii, Oku hole oku tu yeleka. Oku hole okumona elinyengo leitavelo loye. Ou shi shii osho? Kalunga oku hole okumona nhumbi to linyenge. Ngeenge ta ti, “Omwene, onde Ku itavela. Oove Omuxupifi wange. Onda itavela kutya Oove Omuveluli. Onda itavela kutya Oove Ou Ho yandje Omhepo Iyapuki. Ndele noinima oyo ame handi pumbwa, Oove Kalunga Ho i yandje.” Ndele hano ngeenge wa hepaulula mo omatimba oye aeshe ndele to udanekele Kalunga osho to ka ninga nge Ye ku kaleke nawa, ndele hano molwaasho inashi ningwa, to fadukile kumwe wafa evaya. Kalunga osho iteshi longifa. Kape na omukalo Ye ku longife. Kape na omukalo Ye ku nyamukule, molwaashi Oha nyamukula ashike paitavelo. Hano, nombaadilila, owa ya, ndele Ye ita nyamukula. Ashike lela, eitavelo lashili ola fikama opo, kala wa shiiva kutya oKalunga. Kala neshiivo kutya oYe.

⁴⁷ Ndele nge Kalunga a pula oshinima eshi shi ningwe, okuhepaulula omatimba oye, nosho tuu, nowe shi ninga, eitavelo tali ti kutya oYe, oshi li eshiivo kutya otashi ka ningwa. Omhumbwe yoye otai ka wanifwa. Akutu, onde—onde lineekela ito shi xutwifa. Nge owa shiiva Kalunga, Kalunga okwa shiiva Ondjovo Yaye. Okwa teelela ashike oku ku yeleka.

Okwe shi ninga omafimbo mahapu. Natu talulule shimwe ile oinima ivali.

⁴⁸ Natu lipule ounona Ouheberi. Kava li ve na okulinyongamena koshikalunga. Kalunga oku na elineekelo muvo. Ndele eshi va uda ve na okuya kediko lomundilo, ova

ti, “Kalunga ketu ota dulu oku tu xupifa kediko eli. Ashike nge Ine shi ninga, ita tu linyongamene kushimwe shoikalunga yoye.” Uwete, ova li va shiiva nove na eshiivo laKalunga.

⁴⁹ Ove shi shii kutya Ye a li Yehova. Ove shi shii kutya Oha nyamukula eilikano. Ashike kutya nee Okwe shi ninga moshinima shavo, ile hasho, oshi na okukala shi li mouwa. Onghee ova ninga ashike elipopilo lavo, va hepaulula omatimba avo, nova enda va uka mefyo.

⁵⁰ Eshi va li va uka kediko lomundilo, ve shi shii kutya va li neshiivo, kutya, nge Kalunga ta efa va pye po, Ote va nyumuna vali, menyumuko. Ova li neshiivo laKalunga, molwaashi ove shi shii kutya Kalunga ota longo kesheshimwe molwa ouwa wavo. Ndele ngeenge tu na eshiivo laKalunga, otu shii kutya Kalunga ota longo kesheshimwe molwa ouwa wetu.

⁵¹ Onghee, ova ninga elipopilo limwe. Ova li neshiivo, nova enda va uka mediko lomundilo. Ndele Kalunga a efa va ye mo; e li, te va tale. Okwa li a hala okumona elinyengo lavo.

⁵² Eshi, ohamba ya ti, “Omwe linyongamena eshi enghuma la shikwa?”

Ova ti, “Ahawe. Inatu linyongamena.” Opo eitavelo loye, ladama lapama.

“Iya, hano, nge ina mu linyongamena, omu shii etokolo lange.”

“Eheno, otu shii etokolo loye.”

“Etokolo lange ole li kutya ediko otali hanyekwa oikando ihayali lipyu lidule eshi la li nale, nohandi mu ekela mo. Omwa hala paife okulinyongamena?”

“Ahawe. Ita tu linyongamene.” Opo eitavelo lavo.

⁵³ Kalunga ta ti, “Iya, Ohandi tale eshi tava ningi kombinga yasho. Ohandi tale elinyengo lilipi eitavavelo lavo li na.”

⁵⁴ Onghee okwa ti, “Mangeni omake avo, ndele mangeni eemadi davo, ndele va twaleni kediko.” Ndele ova enda va uka kediko, nomundilo moipala yavo. Kalunga natango a fikama, te shi tale. Ashike ova li neshiivo kutya Ye a li Kalunga. Ova ninga elihepaululo lavo. Ova ninga kesheshimwe sha yuka, osho ve shii. Ova li neshiivo kutya Ye a li Kalunga.

⁵⁵ Onghee va enda va yukilila kediko lomundilo. Opo kafimbo kaxuuninwa, opo Okwe uya a londoloka okudja momaulu, metemba lomhepo, ta pepele oupepo kuvo, fimbo Te va hekeleke nokupopya navo.

⁵⁶ Kalunga oha pitike eitavelo loye li uye pomhito opo li na okulinyenga.

⁵⁷ Opa li Job, wEtestamenti Likulu, eshi Satana, omulundili wetu, e mu lundila e li omulunde womeholeko. Ashike Job oku shi shii kutya ina nyona. Oku shi shii kutya okwa hepaulula

kesheshimwe osho a ninga, nokutula ko exwikilo yambo. Osho sha li oshipumbiwa shaKalunga. Osho ashike Kalunga a pumbwa, sha li kutya exwikilo yambo nelihepaululo. Ndele Job okwa ninga oinima oyo.

⁵⁸ Ndele Satana okwa ti, “Ohandi kufa po eengamelo daye, shaashi ye omulumenhu oshipuna. Ohandi kufa po eedi daye.” Ndele lwahauxuninwa okwa kufa po ovana, vokomutima waye.

⁵⁹ Natango, Job a fikama a anyena, osheshi oku shi shii kutya Kalunga, iya, a li neshiivo Ye a li Kalunga, osheshi okwa popya naYe, nokwa wanifa po oipumbiwa Yaye. Okwa konga nokumona, “Onda ninga keshe exwikilo yambo. Onda ti momutima wange, ‘Kashiimba eshi ovamwangemati va ninga o—o oshivilo, novamwangekadona oko va li, kashiimba pamwe ova ninga oulunde meholeko momitima davo, onghee ohandi ka ninga exwikilo yambo kuvo nokuhepaulula epuko lavo.’”

⁶⁰ O Kalunga! Ngeenge omunhu a kaleka po osho Kalunga a ti naninge, e na eshiivo Ye oKalunga, Ye e na okunyamukula. Eitavelo ta li Mu ifana poshiningwanima, efimbo keshe.

⁶¹ Ngeenge owa mana osho u shii sha yuka, ngeenge wa wanifa po oipumbiwa Yaye, ngeenge wa hepaulula nokuyukifa, nokumana elialuluko, noku tula koshipala shaKalunga. Nghina konasha nhumbi Ye e li a mwena, Oku li natango Kalunga, a teelela oku tula ko eitavelo olo. Owa mana oilonga yoye, paife Okwa hala okumona eitavelo loye koilonga yoye. Okwa hala okumona osho to ningi.

⁶² Nge owa vaekwa nokuilikanenwa, Kalunga okwa teelela okumona kombinga yaasho wa itavela. Haku lotokela Osoondaxa ya shikula ko, noku lotokela efiku la shikula ko, nomuveluli a shikula ko e uya moshilando. Okwa teelela okumona elinyengo meitavelo loye. Haku shuna monima, efiku la shikula ko, nokutya, “Ondi udite nai unene, nghi weete nda veluka.” Ino wana okuya momukweyo weilikano, onhele yotete. Ino wana. Ino wana. Ino lilongekida, tuu. Ino itavela kutya Ye oKalunga. Ina ndi. . .

⁶³ Oto dulu u tye, “Mumwatate Branham, ita ndi tu kumwe naave.” Onghatu yoye mwene tai holola eshi uli. “Koiimati yavo ota mu va shiiva.” Nge omunhu ta ti kutya ye Omukriste; ndele natango ota kolwa, nokushila omakaya, nokundobola, nokupopya omashendjo anyata, nota ti, “Oshitopolwa shOmbibeli osha yuka, noshitopolwa hasho.” Ota dulu okuudifa Evaengeli, ndele telikale oshitopolwa shOmbibeli. Oku li natango omulunde. Ke li mondjila, tuu.

⁶⁴ Ashike ngeenge owa hepaulula poluhaela kutya Kalunga oye Kalunga elifa, nonghahalamwenyo yoye ya yandjwa momake Aye, i kale, “Omwene, aame onhata; Oove Omumhi,” hano pula osho wa hala. Eitavelo itali linyenge nande. Ota li fikama lela opo.

65 Nande eenghalo dafa tadi u okudja kolulyo nokolumosho, ashike eitavelo olo itali li nyengifwa nande, molwaashi owa shiiva kutya Ye oKalunga. Ndele nge Ye oKalunga, Oha kaleke po eudaneko Laye. Ye iha ningi eudaneko ndele te li teya. Nge Ye oKalunga, Oku na okukaleka po eudaneko Laye. Akutu, ondi shi hole. Oku na okukala nasho.

66 Job okwa ninga omayambo aye; okwa ninga kesheshimwe. Oku shi shii kutya okwa li ayuka. Ndele ope uya oilyo yongeleka, dimwe domeengeleka domaukwaongalo amwe, va tya, “Job, oto dulu naave yo u hepaulule kutya ove omulunde, osheshi Kalunga ita efa u handukilwe ngaha kakele wa li omulunde.”

67 Ashike Job okwa ti, “Onda ninga elihpaulula lange. Onda tula exwikilo yambo koshipala shaKalunga, ndele ame nghi fi omulunde.” Oku shi shii apa a li a fikama. Hano kesheshimwe osha ya shatwikila, shatwikila ashike nokutwikila nokutwikila, shidjuu ngaashi ashike ngaashi tashi dulu ku ya, shikendabale okutula Job pedu, nokueta Job pomhito opo e likale Kalunga nokulikala exwikilo yambo olo. Omunute lela tokufa onghatu kusha osho wa hepaulula, otashi ulike ounghundi woye, elimbililo loye laKalunga. Owa pula sha Kalunga, nokweendauka we shi limbililwa, hano ove omulimbililwa ndele haomwiitaveli.

68 Job eshi shii apa a fikama, nokwa fikama a kola kekanghameno olo.

69 Kape na onghumwe Pruitt a ti, movili yokufya kwaye:

KuKristus, Emania lakola, nda fikama;
Omadu aeshe amwe otaa nginge.

70 Kemanya olo lakola lelihpaaululo laJob, nande omwalikadi omuholike waye e mu fiya po. Eshi oukolele waye wa li waya, noidinda ya li olutu laye alishe, ndele te linyae yemwene nokufinga efiku olo a dalwa. Ta ti, “Etango liha minikile nande! Omwedi inau pita oufiku.”

Omwalikadi waye okwa ti, “Job, owa mona oixuna nai. Omolwashike ito fingi Kalunga ndele to fi?”

71 Ye ta ti, “Ove to popi wafa omukainhu elai.” Okwa li neshiivo opa li Kalunga, nokwa wanifa po oipumbiwa. Akutu, ondi udite oukwamhepo. Oku shi shii kutya okwa wanifa po oipumbiwa yaKalunga, nosha wana. Kalunga okwa li ta yelege eitavelo laye. Ota yelege loye. Ota yelege lange.

72 Ashike ngeenge otwa wanifa po oipumbiwa Yaye, “Lidilululeni keshe umwe womunye nokushashelwa mEdina laJesus Kristus mu diminwe po omatimba eni, ndele nye otamu ka pewa oshiyandjwa shOmhepo Iyapuki,” olo eudaneko Laye. “Umwe mokati keni ta vele, na ifane ovakulunhu vongeleka. Nave va vaeke momaadi, nokuilikanena. Eilikano leitavelo

otali xupifa omunaudu, naKalunga ote va yambukifa po.” Osha wana. “Hepaululeni omapuko eni, ou namukwao, ndele ilikanenafaneni.” Owa wanifa po oipumbiwa yaKalunga.

⁷³ “Oilongadiliko ei tai shikula ovo va itavela. Omedina Lange tava te mo eendemoni; otava popi omalaka mape; nge va kwata omayoka ile tava nu oudiyo, itau va ningi sha; nge tava tenheke omake avo kovanaudu, otava veluka.” Osha wana.

⁷⁴ Kala neshiivo laKalunga. Kala u shi shii, kutya momutima woye, kutya owa itavela kutya oyo Ondjovo yaKalunga. Job a li.

Omwalikadi waye ta ti, “Omolwashike ito Mu fingi ndele to fi? Omolwashike, oto naipala efimbo alishe.”

⁷⁵ Ongahelipi Satana ehole oku shi ekela kuove. “Omolwashike, uhe li xwepo shidule wa li eshi wa li wa vaekelwe. Uhe li xwepo shidule wa li eshi vo ovaudifi veku ilikanena. Vo ovaudifi inava yuka, monhele yotete.” Kashina sha kombinga yomuudifi oo. Eitavelo loye muKalunga omunamwenyo, tali kulu. Hasheeshi omuudifi e li; osheshi Kalunga e li. Omuudifi ina ninga nande eudaneko; Kalunga a ninga eudaneko. Kashi li komuudifi; oshi li kuKalunga, neitavelo loye okuitavela kutya oo oKalunga. Onghee kala neshiivo laKalunga. Kala neshiivo kutya oKalunga, naayo Ondjovo yaKalunga. Ndele Kalunga oku li mOndjovo Yaye.

⁷⁶ Ndele Job okwa ti, “Ove oto popi wafa omukainhu elai.” Ta ti, “Omwene a yandja, nOmwene a kufa po; layambekwa Edina lOmwene.” Okwa li neshiivo kutya opa li Kalunga.

⁷⁷ Ndele eshi e shi pitifa mo mokanya kaye, omipwalakato da tameka okungunguma noushelu ova tameka okushela. Kalunga okwe linyengela poshiningwanima. Alushe ohashi Mu ifana poshiningwanima. Okwa kala a mwena efimbo lile.

⁷⁸ Osho osho Ta ningi. Tala konduba ei yovamangwa-heli Ovaamerica, ovai-kongeleka ovaliningifi. Ame inandi handuka. Ashike oulunde ohau handula kesheumwe ou e li a yuka naKalunga. Inandi handukila oshiwana, inandi handukila ovanhu, ashike onda handukila Omunawii oo a etifa oinima ei okupofipaleka ovanhu.

⁷⁹ Ovafita ava ovapofi novaudifi nava ye noinima imwe inini yoludi lelongo lopa-nhu. Ou na okukala wadalululwa. Ndele Kalunga ta kaleke po Ondjovo Yaye. Umu wete ngaashi teva ngungumaneke. Xwepo u shiive kutya oku na Kalunga. “Ve nemoniko longaho letilokalunga, notave likale Eenghono dalo.”

⁸⁰ Ohepele ei, omukainhu munini, oku shi shii kutya Ye a li Kalunga. Ngaashi oshiyuma shaenda tashi pu, tashi pu, tashi pu, tashi pu, onghalo yanaipala nokunaipala, efimbo alishe. Ashike Kalunga okwa li a pitika shi kale ngaho. Oku hole ashike okuninga ngaho. Oku hole okutula eitavelo loye

keyeleko, a tale nhumbi to linyenge musho, efa uvaekwe nokuilikanenwa, hano shi ku naipaleke. Ta ti, “Ila, Satana, mu tula keyeleko. Ondi shi shii okwa itavela Nge.” Yambeka Kalunga fiyo alushe! Akutu, ame! [Mumwatate Branham ta hakele omake aye oikando ivali—Sd.] “Mu tula keyeleko paife. Ondi shi shii okwa kufa ko Ondjovo Yange molwaasho.” Ota dulu a tye ngaho kombinga yoye?

⁸¹ Okwa ti ngaha kombinga yaJob. Ta ti, “Muningila kesheshimwe wa hala, ashike ino kufa omwenyo, osheshi Ondi shi shii oku hole Nge. Okwa ninga exwikilo yambo. Okwa ninga oipumbiwa. Okwa ninga osho Nde mulombwela a ninge, nokwe shi itavela. Paife mu alangatifa komakala nge owa hala.” Okwa kufa po kesheshimwe puye. Kalunga okwe shi hapupalifa eshi Ye e shi mu shunifila. Eheni, Ota dulu.

⁸² Oha tula eitavelo letu keyeleko, a tale nge otwa itavela lela kutya oYe Kalunga.

⁸³ Omukainhu ou munini, kape na elimbililo, ta ti, “Onda ilikana. Onda ilikana. Ondi shi shii ame omuhenangushu Omupaani.”

⁸⁴ Dimbuluka, Jesus okwe mu popya mOmbibeli. Okwa ti, “Kapa li ovafiyekadi vahapu momafiku aElia? Ashike okwa li a tuminwa kuumwe, nokwa li Omupaani.”

⁸⁵ “Akutu,” okwa ti, “Handi ilikana.” Pamwe, eshi a mona okamungome oko kanini kaxuuninwa, eflyo le uya momuvelo ndele tali uya moshivelo. Okulumata ko lumwe, okapambu, ndele ye nomonamati waye vafya. Ondi mu wete, oufiku aushe, tailikana, omhepo oyo yapupyala tai pepe, nedu lakukuta, novanu tava kwena notava kuu momapandavanda. Okwa endauka, neumbo. Okwa tala kokamati kaye kanini. Atala kokamudjalo kokunangalifa kako kanini; aisho oya li kondje, neemhadi daye da pita mo. Okwa tala keenyala daye mwene, delingonya. Okwa enda ta i konima nokomesho, ashike okwa ti, “Ondi shi shii kutya Ye oKalunga. Onda ninga elihepaululo lange alishe. Onda mana kesheshimwe osho Ye a pumbwa. Ame handi pulile eemwenyo detu, molwa oshinge Shaye.” Kalunga okwe mu mona.

⁸⁶ Aveshe vo muvo va li vava nove na etutulo linene kumwe kulili, ve li wapaleka, ve na oshinanena sheuliko lokino ile shimwe, tava endele pamwe nounyuni. Ashike omukainhu oo okwa li aeke naKalunga.

⁸⁷ Omutenya wa twa. Okwa ti, “Aka kanini ka lilaana ofiku aushe molwa sha shokulya. Ohandi ningi shike neshambekela linini loufila?”

⁸⁸ Ou shi shii, kutya oufila owa li Kristus. Keshe omulihongi wOmbibeli oku shi shii kutya Kristus okwa li Oufila-yambo. Ndele oufila yambo oo ou na okukala wa tuwa nomushi

welikalekelwa, yoo, fiyo tau tete keshe okapambu kanini kepongu shelifa; molwaashi Jesus Kristus elifa, onghela, nonena, nofiyoalushe. Ndele keshe omwiitaveli osho aitavela nokutululumukwa kusho. Halleluya! Oto dulu u na aishe yoye ikulu, oukwamhepo watalala ove wahala. Sha nge, onda itavela Kristus elifa onghela, nonena, nofiyoalushe. Onda kufa efikamo lange mounyuni wovahenakalunga. Onda itavela natango kutya Ye okwe lifa onghela, nonena, nofiyoalushe.

⁸⁹ Vo omishi tadi tete kesheshimwe shomuyo shelifa ashike, molwaashi Okwe lifa. Oku li Kalunga elifa osho hano Ye a li, Osho e li nopaiife, ongula ei. Ye alushe ota kala elifa. Osho osho oufila tau ti.

⁹⁰ Ndele omaadi otaa ti Omhepo, ngaashi tu shi shi shelikolelela kuHesekiel 4, nosho tuu. Olo etomelo hatu vaeke nomaadi; oo Omhepo. Osho shike? Ngaashi Omuyapuki Johannes 4, “Tate ota kongo ovo tave Mu linyongamene mOmhepo nomOshili.” Jesus okwa li Oshili. Ye a li Oufila-yambo, noomaadi aa a li Omhepo. Ndele Omhepo, ya lumbakanifwa nOshili, oku na okweeta po sha. Shi tula kumwe, otashi ningi omungome. Akutu!

⁹¹ Eitavelo loye oli li peni? Ngeenge Ondjovo yaKalunga yaudifwa mounafangwa Wayo, nonande omEenghono Dayo, kutya Jesus Kristus elifa onghela, nonena, nofiyoalushe, nOndjovo yatetekela molwa Oufila, ou na Omaadi okulumbakanifa naYo. Otashi dulika shikale ashike okashambekela kaninii, ile onguto iyadi, ashike, kutya oshike, osho lela.

⁹² Paife oshe lilongekidila shike? Oshe lilongekidila omushiyakano. Oshe lilongekidila eliyambo-mwene. Osho u na okuninga. Nge Ondjovo oya udifwa, nou na Omhepo nOya lumbakanifwa mumwe, osho eliyambo-mwene okulikala keshe oululume, okulikala keshe ouvela, okulikala kesheshimwe osho shi li omhinge kOndjovo yaKalunga, nokufikama kusho.

⁹³ Ndokotola ta ti *eshi*, *shinya*, ile *shikwawo*; ino ninga po eyooloko lasha. Ove fikama kuSho, molwaashi Kalunga osho a ti. Oufila owe uya. Ou na Omaadi. Ove I lumbakanifa mumwe.

⁹⁴ Paife, ondi udite ewi. Oshi li oshitangotoka. Ewi la popya, ndele la tya, “Inda moluumbo ndele oto kufa oikuni ivali.” Owa didilika, Omushangwa owa ti “oikuni ivali”? Omushiyakano. Oku na oufila nomaadi, ashike otaka ifanwa ko, e linyenge paife; e linyenge nasho. Shihapu u na, Oufila uhapu ile Omaadi ngaashi wa pumbwa, ashike ou na okulinyenga; eliyambo-mwene.

⁹⁵ Oikuni ivali. Monale kava li va mona omukalo muwa wokutema omundilo. Ngeenge to kufa oshikuni ndele to shiyale shakambakana koshikuni, tema pokati kayo, ehela eexulo adishe. Ovaindia ohava tema omundilo wavo. Onde u

tema, oikando ihapu, oufiku aushe. Kufa ashike endangalati, ndele tali kala *ngaha*, nalikwawo *ngahenya*, ndele kala ashike noku li undulila momundilo ngaashi tali pi.

⁹⁶ Oshikuni osho osha li omushiyakano. “Oikuni ivali,” Ombibeli ya ti. Ewi ola ti, “Inda pitila moluumbo ndele to kufa oikuni ivali.” Pefimbo opo, kombada yomhunda, okwa li ewi langunguma komuxunganeki nola tya, “Inda koshilando. Nde ku lombwela.” Akutu, ame! Aveshe ova dulika. Shimwe oshi na okuningwa po. Aveshe vomuvo tava dulika.

⁹⁷ Ngeenge omuudifi ta udifa Ondjovo, nomunhu oo Ei tambula Ei itavela nokulinyenge kuYo, shimwe oshi na okuningwa po. Nge ou li omulunde, ou na okukala wa xupifwa. Nge oto vele, ou na okukala wa veluka, molwaashi Kalunga okwe shi udaneka, nge tu na eshiivo laKalunga.

⁹⁸ Onga eshiivo ngaashi Ye oKalunga, Oku na okukaleka po Ondjovo Yaye. Eshiivo! Hano elombwelo ola li, “Inda koshilando, osheshi Onda lombwela omufiyekadi.” Emoniko la holokela omuxunganeki. Apa okwe uya, ta ende. Ke shi shii oku a uka; itashi ningi eyooloko lasha. Ota dulika ashike.

⁹⁹ Ke shi shii oko oikuni ili ya nangala, ashike ope na oikuni ivali ili moluumbo lwaakwinya. Okwa twikila. Okwe uya moluumbo. Ta lengalenga, “Akutu, oshipyu ngahelipi!” Euyaano okudilila moshilando, ovavambeli voufiku ve uya mo, tava hakana, tava nu omaviinyu avo, nosho tuu. Ta tale mepandavanda. Ke wete sha. Okwa mona oshikuni shimwe; ombinga yomushiyakano, eliyambo-mwene. Okwa kufa oshipambu shikwao, oshikuni. Ndele eshi a toola po oshikuni osho oshitivali . . .

¹⁰⁰ Akutu, osha kala shi tilifi ngahelipi, efyo la nangala poshivelo. Ye nokamonamati kaye vena okulya okapambu kamwe kanini kokapapula komungome nokufya. Ashishe osho sha li. Ndele omafimbo amwe, mokati koutile, osho hatu udu ewi.

¹⁰¹ Eshi a toola po oshikuni osho oshikuni shitivali nokushuna, opa li ewi ta li dilile koshivelo, tali ti, “Etele nge omeva manini meholo.”

¹⁰² Okwa punguluka a tale, noikuni ei ivali meke laye, noufila nomaadi a lumbakanifwa nokwa pwa. Okwa ti okwe shi pyakuduka, sha lumbakanifwa mumwe. Osho nee, Ondjovo nOmhepo, ina okulumbakana mumwe. Tula komushiyakano weliyambo-mwene, nokuanya kesheshimwe osho shi li omhinge kwaasho wa pula. Osha yuka. “Onde i lumbakanifa, paife ohandi ka tala oikuni inya.”

Ndele ewi olo ola ti, “Etele nge omeva manini okunwa, meholo.”

¹⁰³ Okwa tala, noku wete omulumenhu a fikama, a yaamena koshivelo, weemhanda-dafipatela, weendjedi,

womutwe-wongwala, a tala koshivelo, noshitetela shikulu shoshipa shodi she mu kambekwa. Tamonika afa a li oludi woludi-moniki omulumenhuelela womukulunhu.

¹⁰⁴ Okwa ti, “Ohandi topola omeva ange naye.” Omeva Omwenyo, ou na ehalo okuayandja kukeshumwe, okulombwela kesheumwe, okuya keshepamwe. “Okafimbo ashike, omufimanekwa.” Okwa shuna, noikuni ili meke laye.

¹⁰⁵ Ndele ewi la ngunguma vali, “Haku topola omeva oye akuke, ashike etele nge okapambu kanini komungome meke loye.” Omungome womwenyo; omeva omwenyo! Osha li shomwenyo? Ota dulu okufya diva ngaashi osho shaxula po. “Etele nge omeva oye ndele etele nge omungome woye.”

¹⁰⁶ Oshike hatu mono apa? Oshilongwa shilipi hatu dulu okumona apa? “Konga tete Ouhamba waKalunga, nouyuki Waye aushe; oinima ikwao otai wedwa ko.”

“Etele nge omeva manini nokapambu komungome.”

¹⁰⁷ Hano okwa punguluka, moutile waye. Ondi mu udite ta ti, “Omufimanekwa,” shimwe shafa eshi, “owa yooloka ko kovalumenhu ovo nda mona, novalumenhu ovo nda uda va popya. Owa fa wa wanenwa kwaasho to ti. Ashike ondi na oufila auke wa wana, eshambekela alike, nonguto aike iyadi yomaadi. Onde i pyakuduka, nohandi ke i telekifa oikuni ei ivali. Ndele handi ke i lya, ame nomonamati wange, nokufya. Osho ashike ndi na.”

¹⁰⁸ Oshike twa uda, hano, sha shikula? “Ashike, etele nge okamungome kanini, tete.” Kalunga, tete. Kashina kutya umwe elili ta ti, kutya kesheshimwe shilili, oundangi umwe ulipi, otashi monika shitolifi ngahelipi, kutya oshi kale oshike, kufa Kalunga, tete. Ondjovo Yaye, tete.

¹⁰⁹ “Ndokotola ta ti itandi kala nawa.” Ashike, Ondjovo Yaye, tete. “Ame omulunde unene. Ame ombwada. Ame omundoboli. Ame ongholwe.”

Ondjovo yaKalunga, tete. “Nonande omatimba oye akale ngaashi atilyana, otaa kala ngaashi atoka ngaashi eemhawe; atilyana afa ohonde, otaa kala atoka afa olududi.” Tete, Kalunga.

¹¹⁰ “Inda, etele nge okamungome kanini, tete. Ashishe osho una, shi eta kuame.” Owa hala okui yandja momake Aye?

¹¹¹ Onghalamwenyo yange, ashishe osho aame. Ondi na omido omilongo nanho. “Owa hala, William Branham, eshi ete kuAme? Owa hala, nye ounona vanini, okweeta eenghalamwenyo deni kuAme? Owa hala? Otamu dulu oku shi ninga, ovanaudu? Otamu lineekele Nge? Tule Nge tete.”

¹¹² “Etele nge okapambu komungome meke loye, ndele to etele nge omeva manini.” Okwa tala kuye. Opa li sha she mu lombwela kutya omulumenhu oo oku shi shii kombinga yaasho ali ta po pi.

Kalunga oku shii eedi Daye Mwene. “Eedi Dange odi shii Ewi Lange. Ove shii ngee Omushangwa ile hasho, ngee osha yuka ile hasho.”

¹¹³ Okwa punguluka, meduliko. Osho una okuninga. Ndele eshi a punguluka, a dulike kwaasho omuxunganeki a ti na ninge, hano ope uya omungungumo okudja kEulu, oo keshe omunhu ta tale nokuuda. Osheshi, ope uya omungungumo wadja mewi lomuxunganeki, kutya keshe omulunde nakeshe omunaudu a djuulukwa okuuda, “OMWENE OSHO TA TI.”

¹¹⁴ Ongahelipi twa djulukwa oku Li uda! Ongahelipi ovanhu ovo veli mondjila yange, tava ti, “Ila komuvelo ou. Namuwangekadona oku li *musho*. Ohanana yange, yange, pedu nai. Tya ashike ondjovo.” Ongahelipi to dulu oku shi tya ofimbo shi li mokanya koye? Ove ngeno we shi tya ovmwene. Ashike ova djuulukwa okuuda kutya, “OMWENE OSHO TA TI.”

¹¹⁵ Opo oshe uya, popepi nongubu, molwaashi okwa li ta dulika. Ndele outile owa hula. “OMWENE OSHO TA TI. Oshiyuma itashi ka pwa, ile oshanga shi kukute, fiyo efiku olo Omwene Kalunga ta lokifile edu odula.” Akutu, ehekeleko olifike peni!

¹¹⁶ Okwa ninga omungome. Okwe u yandja komuxunganeki. Okwa shuna ndele ta ningi dimwe domonamati nayemwene. Ndele ova lya noku nwa, noshihapu, kombada yedu.

¹¹⁷ Osha dja peni? Osha ya ko ngahelipi? Paunongononi lombwele nge oufila oo apa wa dja. Omaadi oo okwa dja peni? Okwa ya mo ngahelipi moshanga? Okwe shi pima shakukuta, ongula keshe. Okwa mana oshiyuma shoufila, ongula keshe, nosha li shakukuta. Ashike eshi eli shuna mo, omo wali. Owa dja peni? Kufa Kalunga paNdjovo Yaye. Kala neshiivo laKalunga. Ye Omushiti.

¹¹⁸ Otashi dulika wa kanifa oukolele woye. Otashi dulika wa kanifa okuongala kwoye. Mu Kufa paNdjovo Yaye. Kala neshiivo kutya Ye oKalunga. Omafimbo matilifi oo ewetike paife, itaaka monika matilifi unene nge oto kufa ashike Ondjovo Yaye ndele tokala neshiivo kutya Ye oKalunga.

¹¹⁹ MoNdowishi, lumwe, onda mona efano, naalushe ola dama nge. Omupaindi Omundowishi okwa painda...efano olo—olo la ifanwa “Edu Shilemo.” Ndele ngeenge we li mono, kokule oshinano, olo enyanyalifinai-kutala outile ino u mona nale. Oilemo ashike yamelwa kumwe, ngeenge to li talele okudja oshinano shile. Ashike ngeenge we uya lela popepi nalo, otali lunduluka. Osho omavava Ovaengeli taelidenge kumwe, tava imbula halleluya kOmwene. Onghee osho outile uli omafimbo amwe. Nge owa tale kulo, oshinano shile, otali monika litilifi nolilaula. Ashike kufa Kalunga paNdjovo Yaye ndele kala neshiivo kutya Ye oKalunga, ndele to i popepi nalo, oto shi mono mo osho ashike omavava Ovaengeli ta-elidenge kumwe.

¹²⁰ Ye a li hanga afa Abraham a li, aifanwa ayandje kesheshimwe eshi kwete, eshi tule koaltari yeyambo. Pamwe owa ifanwa shafa ngaha, ongula ei. Efa po eendjila doye. Efa po okuhaitavela kwoye. Efa po kesheshimwe ushi na. Ndele hano kufa Omaadi nOndjovo, ndele toI lumbakanifa mumwe, ndele toI tula koaltari yeliyambo-mwene. Oto mono mo, Otashi ifana Kalunga poshiningwanima, ngaashi eshiivo ngaashi ame nda fikama moshiudifilo eshi.

Shi diladila fimbo hatu ilikana.

¹²¹ Ouna omhumbwe nena? Ouna omhumbwe inenenene idule omafa oye taa dulu okuhanga? Oimaliwa oi li pedu ito dulu okufuta omafutulo oye? Ounona ova hala eenghaku dipe, ndele ku na oimaliwa u di lande? Oshiyuma osha pwa keumbo loye, noshanga shoye oshi li po ku kukuta? Ito dulu okulanda oipalwifa yoimuna yoye? Ndele, opo, shimwe sha puka? Dimbuluka, Okwa ninga eudaneko.

¹²² Oto vele, na ndokotola kwa ti kutya owa pumbwa etando? Ku na oimaliwa oku shi ninga? Ouna omhumbwe.

¹²³ Ove omulunde? Omhumbwe yoye oinene, u shi shii nge Kalunga ta ifana, nena, oto kana? Ove omushunimonima to faduka po Kalunga? Ndele ou shi shii ou li wongeleka imwe, ashike ou shi shii ino yuka? Omaliudo oye mwene ta eku lombwele, shelikolelela kOndjovo, kutya ino yuka. Ndele ou na omhumbwe. Ino pitika eendjovo edi di wile medu lomakiya, ile komamanya, omitima manya. Nadi wile mouwa, medu loushoso.

¹²⁴ Nge oto vele ndele ove. . .ndokotola ta ti ito kala nawa, ndele to udanekele Kalunga kutya oto Mu longele omafiku aeshe onghalamwenyo yoye, ndele owa shiiva kutya Ye oKalunga, ila wanifapo oipumbiwa Yaye. Nge ouna omhumbwe, ninga tete ngaashi shifike ngaashi to yelufa eke loye kuKalunga, kutya ou na omhumbwe ya sha? Kalunga ne ku yambeke.

Natu ilikaneni.

¹²⁵ O Omwene, ngaashi ashike eshiivo ngaashi ndi li moshiudifilo eshi ongula ei, ondi shii kutya kape na limwe lomomake oo a yeluka lili Uhe li shii, shaashi Oove Kalunga. Owa ti, "Oiyandja ihapu ihai landwa nouhaulapa vavali? Oshihapu unene ngahelipi udulife oshiyandja!" Oshihapu ngahelipi unene Ove to mono omake oo omaxulepo, omo Omona Woye Jesus ea fila! Ongahelipi unene Ove to mono omake avo hano Ove oshiyandja, nge osha wile ongula ei! Onda wana osheshi. . .engafifi loiyandja itai landwa nepeni ongula ei, 'shaashi kape na umwe ei hala. Ndele ope na oupyakadi wokui paka. Ashike Ou shii keshe shimwe shomuyo; Ou shii olwenya keshe olo lili molutu layo. Ou shii oxwiki keshe oyo ili komutwe wetu.

¹²⁶ O Omwene, nyamukula eilikano. Pitika va kale neshiivo, ongula ei, kutya Oove Kalunga, naaI Omhepo Yoye. Ouhenakonasha nelimonikifo eli loshinanena-fiku oukwamhepo ukanyuke ko kuvo, okutya, “Akutu, ame ondongeleka *yatya* yonumba.” Kalunga, osho nashi dime mo momadiladilo avo, paife ngaha. Mokafimbo aka kamwe, nava kwate ko diva Omwenyo waAlushe. Ndele hano tava kongo no ku U fila ondjala, okushiiva kutya Kalunga oshike, notava shiiva kutya oYe. Oha kaleke po Ondjovo Yaye.

¹²⁷ Komulunde, nave lidilulule meendelelo, veli longekidile eshasho mEdina laJesus Kristus. Ndele Owa udaneka Oto va pe Omhepo Iyapuki. Owe shi tya, Omwene. Owa kaleka po eudaneko Loye.

¹²⁸ Ope na omushunimonima oo a shiiva kutya Oove Kalunga, notava elaela. Nave u ye nena, molwaashi Owa ti, “Nonande omatimba oye akale ngaashi atilyana, otaa kala atoka afa eemhawe. Atilyana afa ohonde, otaa kala atoka afa olududi.”

¹²⁹ Ndele nge opena ovo tava vele, nava dimbulule kutya Oove Kalunga. Owa kaleka po Ondjovo Yoye. Ou na okukaleka po Ondjovo Yoye. Ngaashi velitula vovene, nOmaadi avo, Omhepo oyo ili muvo tai hepaulula va itavela. Ndele hano, yoo, nOndjovo, Omungome wOmwenyo oo watetekela, Kristus; weva twilwa, mEtestamenti Likulu; nomEtestamenti Lipe, okuulika kutya Okwe lifa onghela, nonena, nofiyoalushe. Nava lumbakanife Ondjovo oyo nOmaadi, nOmhepo, oyo ve na, hano va fikame keemhadi davo koaltari, va tye, “Eshi osho ashishe ndi na, Omwene. Onde shi eta.”

Akutu, ongahelipi To indjipala! Ongahelipi shi na okwiifana Kalunga kondjokonona poshiningwanima osho! Ongahelipi shi na okuninga Yehova a fikame, nomutima wa dinda, kutya, “Ondi na okaana taka dulika kuAme. Onde mu tula meyeleko, nokwa ulika kutya oku hole Nge nokwa itavela Nge. Okwa shiiva kutya Aame.” Osheshi okwa ti wa, “Ou te uya kuKalunga e na okuitavela kutya oYe, nomufuti waavo ta ve Mu kongo nouidiini.” Shi ninga, otundi ei, ngaashi twe shi yandja kuOve.

¹³⁰ Ndele, paife, fimbo twa nyongameka omitwe detu. Ndele ovo veli momhumbwe yasha, fikameni keemhadi deni, ava mwahala okutu. . . Paife, nge ove ino shiiva kutya Ye oKalunga. . . Nge owa shiiva Ye oKalunga, ota ka kaleka po eudaneko Laye, exupifo, eveluko, kutya oshike, nge owa shiiva kutya Ye oKalunga, fikama keemhadi doye. Nge ou na umwe elili wa hala a ilikanenwa, fikama keemhadi doye. Nge owa—nge owa shiiva kutya Ye oKalunga, ninga eindilo loye li shiivike moshongalele shovayapuki. Oto shi ningi ngaashi wa fikama ku doye. . . [Okanhele kehenasha mokateipa—Sd.]

“Onda shiiva oYe Kalunga. Onda itavela kutya Oha kaleke po Ondjovo Yaye. Nonda shiiva kutya omhumbwe yange... Ohandi i tula koshi yOhonde, paife ngaha.” Nge osho wa ninga, efa oulunde keshe. Keshe oulunde oo okuhaitavela. Oto dulu oku kala oshilyo shongeleka, ashike onda hala oku tya oulunde, woye “okuhaitavela.” Oto shi yandje ngaashi eyambo. Oto ke shi yamba. Oto uya komushiyakano. Oto ke shi yamba, paife, okuhaitavela kwoye akushe. Ndele to ku yandje kuYe, ndele shiiva kutya oYe, noto shiiva Ota ka nyamukula. Nge owaasho, yelufa eke loye. Kala ngaho.

¹³¹ Omwene, Oove Kalunga. Apa Omaadi avo nEpungu lavo, la lumbakanifwa mumwe. Otave I eta komushiyakano, oko Omundilo waKalunga tau ka wila momitima davo (nge osho lela va tya) ndele to lungwinifa po eyambo olo. Oto uya poshiningwanima, holola omeva a holama. Okudja kEulu, metemba lOmundilo. Oto li nyengifa omaulu aeshe nedu, oku va futa.

¹³² Ngaashi va fikama nomake avo pombada, nedidiliko kutya ova itavela, ndele veli yandja vovene, neindilo keshe lavo vena, li li koaltari Yoye. O Kalunga kEulu nedu, Omutokoli wOmaulu nedu, paushili Omutokoli wEulu nedu ta hokwa ouyuuki. Paushili Ota kaleke po Ondjovo Yaye, Ove Ou ushi omitima dovalumenhu, nomitima dovakainhu, omitima dovanhu ava.

¹³³ Omwene Kalunga, onda tula omake ange mwene pombada, osheshi ondi shi shii kutya ondi na elunduluko loshimhungulonga paife. Ndele onda itavela kutya Oove. Onde ku mona Wa fikama kwinya mOluudi lOmundilo. [Mumwatate Branham ta konghola koshiudifilo oikando itatu—Sd.] Onde ku mona To kongo oiholekwa yomitima dovanhu. Kape na efimbo limwe Wa dopa. Owe shi udaneka eshi We shi ninga kwinya, oku tauluka epandavanda apa, eshi Wa hovela okulipyakidila okuninga oinima ei. Ndele Owa amena nge mounyuni aushe, naaushe naaushe. Onda shiiva Oove Kalunga. Ondi neshiivo lasho.

¹³⁴ Onde liyandja mwene novanhu ava, neyambo laaishe ndi na, Omwene, kuOve, molwa oshilonga. Onda hovela vali, Omwene, okulinyenga ounyuni aushe. Kwafe nge, O Kalunga. Nge inandi Ku itavela pefimbo limwe, dimine nge po omatimba ange. Dimine nge po okuhaitavela kwange. Ondi shi shii kutya Oove, nomufuti waavo tave Ku kongo.

¹³⁵ Shafaafana, ohandi hepaulula omatimba ovanhu vange, ongula ei, ounghundi wavo noku limbililwa kwavo, ngaashi va fikama nomaoko avo eli pombada. Ohandi hepaulula omatimba avo, Omwene, nomaunghundi etu aeshe. Tuma Omhepo Iyapuki ku fye, noshipatifo sheshilipaleko Loye, kutya Oove Kalunga. Ndele Ou li apa paife oku tu tambula,

noku tu tula momaoko Oye, noku tu alulila kesheshimwe osho fye twa kanifa. Nge oukolele wetu, nau tungululwe lwefele. Nge omwenyo wetu, nau uye kufye ngaashi esheneko, evilimo latwa, la yadifwa nOmhepo Iyapuki, li dule okuulikwa komesho yaKalunga. Nge okuhaitavela, naku uye kufye vali, Omwene, neitavelo okulinyengifa eemhunda. Shininga, Omwene.

¹³⁶ Otwa itavela kutya Oto linyenge, Omhepo Iyapuki nengeneka okupitila metungo eli, kovanhu ava, nomomitima davo, ve linyengifa va tambule Kalunga omunamwenyo. Eshi ohatu ningi mEdina laJesus Kristus.

Eitavelo lange ola tala kuOve,
Oove Odjona yaKalvali,
Omuxupifi Omukwaalushe;
Paife uda nge fimbo handi ilikana,
Kufa po omatimba ange,
Ino efa ndi elaele nande
Okudja puOve.

¹³⁷ Owe shi tya? Owe shi tambula? Yelufa eke loye, tya, “Onde shi tambula paife. Onda itavela.”

Fimbo onghalamwenyo ilaula outile handi
lyata,
Nomanyemato adingilila nge ahapupala,
Kala Oove Omuwiliki wange;
Kaleka omilaulu ouyelele,
Feta po oluhodi loutile,
Ino efa ndi elaele nande
Okudja puOve.

Natu nyongameke omitwe detu.

¹³⁸ Konima yelulilo eli, Etumwalaka leteta—ulo; lelundu, nola etwa po momukalo inau lixwa po, ashike osho Oshili. Ndele nge owe lininipike itavela osho wa pula, kutya oto pewa, ino pitika nande oshimwe shi ku undule okudja mondjila oyo ya yukilila. Opo fikama. Kashi na shifike peni nda udifa, keshe osho handi ningi, ile keshe osho omunhu ta ningi, itashi ka longa sha fiyo we shi tambula ngaashi oshinima shoye shopaumwene.

¹³⁹ Nge owe shi itavela nomutima woye aushe, kesheshimwe osho wa hala. Nge owa hepaulula omatimba oye, Kalunga okwe ku dimina po. Ino shi limbililwa nande vali. Nge ove omushunimonima, owa shunifwa, ongula ei. Nge owa pumbwa Omhepo Iyapuki, hano kala wa shashelwa mEdina laJesus Kristus molwa edimepo lomatimba oye. Oyo Ondjovo yaKalunga. I teI yoololele ongeleka, haukwaongalo, ile umwe elili. Oshi na okukala ngaho. Otu na okuwanifa po oipumbiwa Yaye, haipumbiwa yongeleka, oipumbiwa Yaye. Osho tu na okuninga.

¹⁴⁰ Okwa ti, “Eilikanano leitavelo ota li xupifa omunaudu.” Nge oto vele, onde ku ilikanena eilikanano leitavelo. Owe shi ilikanena momutima woye mwene. Ndele shi itavela, shi tambula, fikama anyena kusho. Oshi na okukala ngaho. Kape na eshi tashi shi kufa po, kutya otashi monika shitilifi ngahelipi.

¹⁴¹ Oto ti, “Iyaa, otashi dulika ku monika shafa handi vele natango.” Osho kashina... Osho omavava ashike Ovaengeli a ongelwa kumwe. Osho ashike. Osho Kalunga molupe leyambeko. Otashi monika shitilifi kuove. Ehena kanini popepi kusho ndele to shi tale vali, tala nge kashi fi Kalunga a fikama po, ta kaleke po Ondjovo Yaye.

¹⁴² Paife ngaashi tu na omitwe detu da nyongama, ohandi shuna oshilonga kuMumwatate Neville, omufita wetu. 

KALA NESHIIVO LAKALUNGA OSH59-0125

(Be Certain Of God)

Etumwalaka eli kuMumwatate William Marrion Branham, patamekelo layandjelwe mOshiingilisa mOsoondaxa ongula, Januari 25, 1959, kEtwaliongalo Branham moJeffersonville, Indiana, U.S.A., ola kufwa okudja kekwatelo lengenete teipa nola lanyanyangidwa metwokumwe mOshiingilisa. Efatululo eli Oshikwanyama ola nyanyangidwa noku andjakanekwa koVoice Of God Recordings.

OSHIKWANYAMA

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Oufemba didiliko

Eemhito adishe oda kalekwa. Embo eli otali dulu okunyanyangidwa koprinta meumbo molwa elongifo lopumwene ile okuyandjwa po, oshali yovene, onga oshilongifo okuandjakaneka Evaengeli laJesus Kristus. Embo eli itali dulu ku landifwa, okwiindjipalekwa mondwanga, okutulwa kowebite, okutuvikilwa momukalo wonumba, okufatululilwa momalaka akwao, ile okulongifwa molwa eyambidido lopashimaliwa pehe na epitikilo laVoice Of God Recordings®.

Molwa ouyelele uhapu ile molwa oilongifo ikwao ili po, alikana kwatafana:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org